

Dithero tsa Tirelano mo Kutlwanong

28/2014 Thero ka Sontaga o o bidiwang Jubilate, e le ka 11. 05. 2014

MO LEINENG LA MODIMO O E LENG RARA LE MORWA LE MOWA O O BOITSHEPO!

1. Sefela sa 29 - 27/26
2. **Thapelo:** Modimo Rraetsho yo o kwa legodimong, re a go leboga, ka le rona o re itshenoletse ka Mowaro Jesu Keresete; gore re go itse ka kitso e e pholosong, le go dumela mo go wena, gore o Modimo o o nosi wa boammaaruri, le gore tsotlhe tse di gona di tlhodilwe ke wena. Ke gona re kopang Mowa o o Boitshepo wa gago o re fe thata le nonofo ya go dumela, le go tlhomama mo tumelong ya nnete e e pholosang. Tsotlhe tse re di kopang mo leineng la la tlotlegang la Morena le Mopholosi wa rona Jesu Keresete. Amen.
3. Epistolo ka fa thulaganyong ya 2 e kwadilwe mo go 1 Johane 5:1-4;
Efangele ka fa thulaganyong ya 1 e kwadilwe mo go Johane 15:1-8.
4. A go ipolelwe tumelo ya bokeresete!
5. Sefela sa 146 - 129/ -
6. Thapelo ya mmadi wa thero.
7. **Epistolo** ka fa thulaganyong ya 6 e kwadilwe mo Ditirong tsa Baapostolo 17:22-34, e re: "Jaanong Paulo a ema fa gare ga Areopago a re: 'Lona banna ba Athene, ke lemoga gongwe le gongwe gore lo tlotla medimo thata. Gonne ya re ke tsamaya, ke leba tse lo di obamelang, ka fitlhela le aletare e go kwadilweng mo go yona go tse: 'YA MODIMO O O SA ITSIWENG'. Jaanong he, ona o lo o obamelang lo sa o itse ke ona o ke o lo bolelelang. Modimo o o dirileng lefatshe le tsotlhe tse di mo go lone, ona, ka e le Morena wa legodimo le lefatshe, ga o nne mo ditempeleng tse di dirilweng ka diatla; le gona ga o direlwe ka diatla tsa batho, jaaka e kete o tlhoka sengwe, etswe e le ona ka osi o o nayang botlhe botshelo le mowa le tsotlhe. O dirile gore setšhaba sengwe le sengwe sa batho se tswe mo mading a le mangwe fela, ba age mo lefatsheng lotlhe; o tlhomamisitse metlha ya bone e e beilweng pele le melelwane ya maago a bone gore ba batle Modimo, e tle e re gongwe ba o apaape, ba o bone; kana ga o kgakala le ope wa rona; gonne re ntse re na nao, fa re tshela, re tsamaya, re le teng, jaaka le bangwe ba

baboki ba lona ba buile ba re: 'Kana le rona re losika lwa ona.' Jaanong he, e re ka re le losika lwa Modimo, ga re a tshwanela go itlhome gore Modimo o ka tshwana le sebopiwa sa gouta gongwe sa selefera gongwe sa lentswe sa botswerere, le kakanyo ya motho. Fa e le metlha ya botlhoka-kitso, Modimo o e tlhokomologile, mme jaanong o laela batho botlhe mo ntlheng tsotlhe go tlabologa; gonne o tlhomile letsatsi le o tla atlholang lefatshe ka lone ka tshiamo, ka monna yo o mmeetseng gona, mme o buletse botlhe tsela ya go ka dumela ka go mo tsosa mo baswing.' Ya re ba utlwa tsogo ya baswi, bangwe ba sotla; ba bangwe ba re: 'Re tla go utlwa gape ka ga moo.' Paulo a tswa jalo mo gare ga bone. Mme banna bangwe ba mo ngaparela, ba dumela, mo go bone go le Dionisio wa Areopago, le mosadi mongwe yo leina la gagwe e leng Damarise, ba na le ba bangwe." Amen.

8. Thero: Phuthego e e tlotlegang ya Morena wa rona Jesu Keresete! Sontaga mongwe wa rse di fetileng o ne o bidiwa ka leina, go tse: Misericordias Domini, e le gore: "Bopelotlhomogi jwa Morena." Nna ke rata bogolo leina ka fa temaneng ya beke ya Sontaga oo le le reng: Ke nna Modisa yo o molemo. Dinku tsa me di utwla letswa la me. Ka a di itse, mme di ntshala morago. Ke di naya botshelo jwa me jo bo sa khutleng. Dithuto tsa Sontaga oo, di ne di bolela, le go rutaka ga tiro ya Modisa yo o molamo. Fano go tshwaiwa, le go gatelelwa ka gore Modimo yo o molemo, ka ga badisa ba sa tshwane. Bangwe ba kgathalela dinku, mme ba bangwe ba lebile fela gore kgwedi e tla fela leng.

Sontaga wa kajeno, one o na le leina le le reng: Jubilate, e le gore "duduetsang!" Ka go leng meduduetso teng, ke kwa go leng boitumelo teng, jaaka leina la Sontaga ono le itlhalosa, gonne bakesete ba opela, le go duduetse, le go itumelela Jesu Keresete, yo o bapotsweng, le go tsoga mo baswing ka letsatsi la boraro, yo o bileng a dira ba e leng ba gagwe dibopiwa tse dintšhwa, jaaka temana ya letsatsi e re: "Fa motho a le mo go Keresete, o a be a le sebopiwa se sešwa, dilo tsa bogologolo di fetile, bonang, di ntšhwafetse tsotlhe." Sekao: Leba botshelo jwa ga Paulo a ise a tlabologe mo Dit. 9:2. Phuthego, Iphistola ya rona e simolola jaana, e re: Jaanong Paulo a ema fa gare ga Areopago a re: 'Lona banna ba Athene, ke lemoga gongwe le gongwe gore le tlotla medimo thata, gonne ya re ke tsamaya, ke leba tse lo di obamelang, ka fitlhela le aletare e go kwadilweng mo go yona go tse: Ya Modimo o o sa itsiweng.

1. Jaanong ona Modimo oo, o lo o obamelang, lo sa o itse, ke ona o ke o lo bolelelang. Ke one o o dirileng lefatshe le tsotlhe tse di mo go lone. Jaanong ka botswerere le botlhale jwa gagwe jwa puo o ne a bona gore ke yone tšhono ya go ba rerela Efangele ya ga Jesu Keresete, Mopholosi wa batho botlhe, jaaka Lefoko la Morena le re: Jaanong ba ka bitsa jang yo ba iseng

ba dumele mo go ene? Ba ka dumela jang, ba ise ba utlwe ka ga gagwe? Ba ka utlwa jang go se na moreri? Ba tla rera jang, fa ba sa rongwe, jaaka go kwadilwe ga twe: Kana di dintle jang ne, dinao tse bone ba ba rerang mafoko a a thabisang a a molemo, (Baroma 10:14-15). Fano go a bonagala gore baagi ba Athene ba ne ba itse gore Modimo o teng, jaaka le mo sebakeng seno sa rona ga se motho ope yo o sa itseng gore Modimo o teng, le fa go na le ba ba ikayang gore ke batlhalefi ba ganetsa badumedi ba ba ipolelang Modimo, ba re: Ga go na Modimo, Mme ka go ganetsa badumedi ka bogale jo bogolo, ba supa segakolodi se se ba sekisang ka mo teng. Motho o ka galefela jang se a se tshwayang, fa se se yo? Ka nako ele kwa Athene ba ne ba itse sengwe, fa go na le Modimo o o sa itsiweng ke bone. Gonne ga se sepe sa tsotlhe tse di gone tse di ka itiragalelang go nna teng ka botsona ntle ga thata ya yo mongwe, yo o mogolo go tsotlhe. Batlhalefi ba nako ele ba ne ba tlhalefile thata go feta batlhalefi ba ba tsieditsweng ke tlhaloganyo ya bone kajeno ba ba gopolang, le go ruta bana mo dikolong, fa tsotlhe di thagile ka go iphetolela fela, ka ba le bantsi ba latlha fela Modimo o o itshenoletseng ka Lefoko la ona.

Paulo o fetisetsa molaetsa o o molemo oo wa gore go na le Modiri wa tsotlhe, e bong Motlhodi wa legodimo le lefatshe, le molaetsa o o molemo wa Efangele ya ga Jesu Keresete Mopholosi le Mmoloki wa botlhe go baagi ba Athene gore ba itse fela gore Modimo o teng, mme ba be ba dumele mo go one, ba tle ba bone phologo, ba se tshwane le medemone e e itseng gore Modimo o teng, fela e sa dumele mo go one. Paulo o ba thalosetsa sentle, fa a re: Ga o nne mo ditempeleng tse di dirilweng ka diatla, le gona ga o direlwe ka diatla tsa batho, jaaka e kete o tlhoka sengwe, v. 25. Seo se tiiswa ka mafoko a kgosi Salomo a a reng: Mme ruri Modimo o ka aga mono lefatsheng? Kana legodimo le le godimo le le godimodimo ga le lekane. Jaanong ntlo e ke e agileng e tlhabela bogolo jang! ,,,, a tswelela ka gore a matlho a gago a nne a a budulogetseng ntlo e, bosigo le motshegare, e bong fela fa o buileng ka ga gona wa re: Leina la gago, Modimo, le tla nna teng, gape le gore o utlwe thapelo a motlhanka wa gago a e rapelang a lebie felo fano, 1 Dikg.8:27-29.

2, Lefoko le tswelela, le re: One Modimo oo, o lo obamelang lo sa o itse; o dirile setšhaba sengwe le sengwe sa batho, se tswe mo mading a le mangwe fela; ba age mo lefatsheng lotlhe; o tlhomamisitse metlha ya bone e beilweng pele le melewane ya maago a bone gore ba batla Modimo, e tle e re gongwe ba o apaape, ba o bone; kana ga o kgakala le ope wa rona. Ka mafoko a mangwe moapotsolo o gatelela gore merafe yotlhe, fa tlase ga lefatshe; bantsho le basweu le ba ditso tsotlhe tse di teng, ba bopilwe ke one o ba o obamelang ka mekgwa e e

farologaneng; o ba gopolang gore o nna mo ditempeleng; e tswe e le one o botshelo jwa tsotlhe tse di tshelang le mewa ya mebele ya batho botlhe di mo diatleng tsa one. Ke gona ka moo ba tshwaentseng ke go o batla o sa ntse o le gaufi le bone; ke gore fa ba sa ntse ba tshela, e seng fa mowa o dule mo mmeleng.

Jesu Keresete ke ene botshelo. Ene ka sebele o buile jalo, a re: Ke nna tsela le nnete le botshelo, Go na le ba ba reng: ba a tle ba ipolele ba re: Botshelo ke wena fela, tsa mpa batho ga ba itse. Ba latlhegetswe ke tsela, ba fapositswe ke sebe. Phuthego, kana le mo malatsing ano a rona, go tse dintsi tse di faposang badumedi mo tumelong ya nnete; ba ineele mo ditirelong medimo e sele; go nna jaaka e kete dipogo le loso lwa ga Keresete di tlaetse ka sengwe go re naya pholoso e e feleletseng. E tswe tsone di nnile tefa e e feleletseng ya maleo a rona, bogolo jang ka rona re le Balutere re nyadiwa ka ntlha ya kolobetso ya bone, le go kolobetsa mo ntlong. Mokeresete o kolobeditswe a le lese, gongwe a godile, o kolobeditswe ka tlhomamo, ga go tlhaele sepentlheng ya pholoso. Ka moo tsapama mo tumelong, le mo go se o se amogtseng mo kolobetsong ya Modimo o o Borarobongwe. Ka yone o phologile, o amogetswe ke Jesu.

3. One Modimo o lo o obamelang, lo sa o itse, ke one o Lefoko la Modimo le re bolelelang gore o tlhomile letsatsi le o tla atholang lefatshe ka lona ka tshiamo ka monna yo o mmeetseng gona, mme o buletse botlhe tsela ya go ka dumela ka go mo tsosa mo baswing. E bile o tlhalosetsa botlhe, a re: Morena yo Modimo o mo tsositseng mo baswing, o laetse ba ba tlaotsweng ke Modimo pele, e bong bone ba ba jeleng, ba nwa nae, a sena go tsoga mo baswing go rerela batho, le go supa gore ke ene yo o tlhomilweng ke Modimo go nna Moatlhodi yo o sa gobeleteng, jaaka baatlhodi ba lefatshe leno; gonne ke Moatlhodi wa tshiamo.

Lefoko le re: Ya re ba utlwa tsogo ya baswi, bangwe ba sotla; ba bangwe ba re: Re tla utlwa gape ka moso. Mme se ba neng ba se utlwa se ka ba tlhola ba se utlwa. Seo le mo metlheng eno ya rona, go teng ba dikereke dingwe ba ba ganetsang tsogo ya baswi; ba re ga motho a sule, go fedile gotlhe gotlhe ka ga gagwe. Tota le fa ba se na go mmoloka, ga ba ke ba etela kwa phupung, le e seng go ya go tthagolela lebitla.

Mme bo bofelong Lefoko le re: Mme banna bangwe ba mo ngaparela, ba dumela, jaaka go umakiwa leina la ga Dionisio wa teng kwa Areopago le mosadi mongwe yo leina la tagwe e leng Damarise, ba na le ba bangwe. Ka jalo go nna le phuthego e e nnang teng kwa Athene ka thero ya ga Paulo.

Ka moo bagaetsho ba ba tlotlegang, a re tshabeng bogale jo bo tlang; a re nneng bonako go utlwa, le go amogela molaetsa e e botlhokwa wa Morena. Kana ke ene yo o dirileng lefatshe le tsotlhe tse di mo go lone, le gore setšhaba sengwe le sengwe se tswa mo mading a le mangwe fela, e bile o tihomile letsatsi le o tla atholang lefatshe ka lone ka tshiamo ka monna a le mongwe yo o mmetseng go nna Moatlhodi, Mopholosi wa batho botlhe ka go mo tsosa mo baswing, e bong Jesu Keresete. Amen.

9. Thapelo: "Ao Morena, 'Foko la 'go ke le le re tshedisang, ke Lohumo, lo gaisa 'khumo tsotlhe lefatsheng. Fa re ka le belaela re ka thewa mo go eng? O re thae mo go lone, re le ikanye tumelong. Bua le nna o re: Amen, o nne yo ' ntlhomamisang. Ke tle ke tswelel pele go go reetsa Lefokong. 'Foko la 'go a le mpuse, ke le rate botshelong, jaaka go dirile ene Maria mo Beibeleng." Thapelo ya Morena: Rara wa rona yo o mo legodimong ...

10. Sefela sa 257 - 239/249

A kagiso ya Modimo e e fetang tlhaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke T. Ratshefola ka ngwaga wa 2013.

Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation.